



Bersama
Prof Dr Taufiq
Yap Yun Hin

Satu aspek yang paling penting dalam isu hak asasi manusia ialah masyarakat mestilah menunjukkan rasa hormat dan toleransi antara satu sama lain. Ini termasuk isu kebebasan beragama.

Bagaimana pandangan Islam mengenai toleransi beragama? Satu cara yang menarik untuk memahami pandangan Islam mengenai kebebasan beragama adalah dengan melihat peranan dan kaedah yang ditunjukkan oleh rasul dalam menjalankan tanggungjawab mereka.

Adakah mereka diutuskan untuk memaksa manusia mengikut ajaran

mereka? Adakah Nabi Musa AS, Nabi Isa AS dan Nabi Muhammad SAW yang diperintahkan oleh Yang Maha Kuasa untuk menyampaikan ajaran yang mulia menghunus pedang atau senjata untuk mendapatkan pengikut mereka?

Sudah tentu tidak! Tidak ada rekod dalam sejarah perjuangan rasul yang menggunakan kekerasan hanya untuk mendapatkan pengikut.

Lihatlah dalam kitab suci al-Quran, sebagaimana firman-Nya pada surah **al-Maidah, ayat 99** bermaksud: "Tidak ada kewajipan yang ditugaskan kepada Rasulullah selain daripada menyampaikan (perintah Allah) sahaja dan

Allah sentiasa mengetahui apa yang kamu lahirkan dan apa yang kamu sembunyikan."

Suatu ketika penduduk Makkah pernah berkata kepada Nabi Muhammad SAW: "Jika Tuhan tidak mahu mereka menyembah berhala, maka mengapa Dia tidak memaksa untuk menghalang mereka daripada berbuat demikian?"

Lantas Allah berfirman dalam surah **an-Nahl, ayat 35** bermaksud: "Dan berkatalah orang-orang kafir musyrik: Kalauolah Allah menghendaki, tentulah kami tidak menyembah selain daripada-Nya sesuatu pun - (tidak) kami dan tidak juga datuk nenek kami -

dan tentulah kami tidak mengharamkan sesuatu pun dengan ketiadaan perintah-Nya.

"Demikian juga yang telah dilakukan oleh orang-orang yang terdahulu daripada mereka. (Apa yang mereka katakan itu adalah salah semata-mata kerana bukankah rasul-rasul semuanya tidak bertanggungjawab selain daripada menyampaikan (kehendak dan hukum Allah) dengan cara yang jelas nyata?"

Pada pandangan Islam, misi rasul bukan untuk memaksa manusia mengikuti ajaran mereka tetapi bagi memimpin mereka menerima Tuhan atas kehendak mereka.

Al-Quran juga dengan jelas mengatakan bahawa tidak boleh dipaksa agama ke atas sesiapa. Hal ini sebagaimana firman-Nya dalam **Surah al-Baqarah, ayat 256**.

Nabi SAW berdepan dengan pelbagai kesusahan dan penentangan di tempat lahirnya iaitu Makkah. Kemudian Baginda berhijrah ke Madinah.

Di sebalik tentang dan penderaan fizikal dihadapi oleh pengikutnya di Makkah, Nabi SAW tetap mendekati orang tidak beriman dengan penuh toleransi.

Apabila Nabi SAW berhijrah ke Madinah, Baginda mendapat wujudnya masyarakat

Yahudi yang besar. Akan tetapi mereka tidak mengganggu Baginda. Mereka tidak dipaksa menganut Islam, malah Nabi SAW membuat perjanjian damai dengan mereka dan memberi gelaran sebagai ahli kitab.

Sesungguhnya ini contoh tertinggi toleransi yang ditunjukkan terhadap penganut agama lain. Perjanjian damai ini memberi jaminan keselamatan dan kebebasan untuk mengamalkan agama mereka secara bebas.

Penulis ialah Presiden Persatuan Cina Muslim Malaysia (MACMA) dan profesor di UPM

Tiada paksaan terima 'agama Islam'